



Aqqalu C. Jerimiassen

UKA 2023/46

Atassut

17. oktober 2023

**Filmiliortarnej pillugu Inatsisartut inatsisissaannik Naalakkersuisut saqqummiussinissamik peqquneqarnissaannik Inatsisartut aalajangiiffigisassaattut siunnersuut. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq.**

(Inatsisartunut Ilaasortaq Peter Olsen, Inuit Ataqtigiit)

Nuannaarutigivarput nunatsinni filmiliornej pillugu inatsisissamik suliaqartoqarnissaanut siunnersuuteqartoqarmat. Inatsisiliornikkullu filminstituttimik pilersitsisoqarsinnaalernissaa ilanngullugu siuarsaanissamut tapersingaarpaput. Taamaaliornikkummi filmiliortut nunanik allanik suleqatissarsiornissaminut aningaasaliisussarsiornikkullu periarfissagissaarnerulissallutik.

Ugguunalu Atassummiit eqqaaqqilaaginnarsinnaavarput nunatsinni eqqumiitsuliortortatsinnut tapersersuinerput annertusarsinnaagippat. Qinnuteqarfissatigut periarfissat pitsanngornikooqaat, inuussutissarsiutigaluguli eqqumiitsuliortunut tamakkiinerusumik tapersersuissagutta akileraartarnikkut aaqqiinissaq sulii ujartorparput.

Tapiissutaannartigummi qinnuteqaasiornikkuinnarlu ataavarnerusumik eqqumiitsuliornikkut ingerlatsiniaraanni pissusissamisoortutut isiginngilarput, inuussutissarsiutigalugumi suliaqartuuneq tapiissutaannartigut ingerlatsinissaq piffissaq siviisunerusoq eqqarsaatigalugu piviusorsiunngilaq. Isumalluutaavallaalissaarmi. Taamaattumik assersuutigalugu Islandimi periusaasoq takussagutsigu, eqqumiitsuliornermik ingerlatsisut akileraarutigisimasatik affai utertissinnaasarpaat.

Taamaaliornikkullu Islandimi eqqumiitsuliortuuneq akilersinnaanerujussuurtut aaqqinneqarsimavoq, eqqumiitsuliortunullu atugassarititaasut pitsaanerullutillu nammineernerullutik ingerlatsippat. Islandillu avammut imminut nittarsarnini taamatut iluatsilluarsimavaa. Pingaartumik filmiliortarnikkut.

Taamatut oqaaseqarluta siunnersuut tamakkiisumik taperserparput.